

QUÆST. 113. Quid prohibet decimum præceptum?

RESP. *Ne vel minima cupiditate aut cogitatione adversus ullum Dei præceptum corda nostra unquam sollicitentur, sed ut perpetuò & ex animo omne peccatum detestemur; contraque omni justitia delectemur.*

QUÆST. 114. Possunt ne autem illi qui ad Deum conversi sunt, hæc præcepta perfectè servare?

RESP. *Minimè: verùm etiam sanctissimi quique, quamdiu vivunt, habent tantùm exigua initia hujus obedientiæ: Sic tamen, ut serio ac non simulato studio, non secundùm aliqua tantùm, sed secundùm omnia Dei præcepta vivere incipiant.*

QUÆST. 115. Cur igitur vult Deus legem suam adeo exactè & severè prædicari, cum nemo sit in hac vita, qui eam servare possit?

RESP. *Primum, ut in omni vita magis magisque agnoscamus, quanta sit natura nostra ad peccandum propensio, tantoq; avidius remissionem peccatorum & justitiam in Christo expetamus: Deinde, ut hoc perpetuò agamus, illud semper me-*